



IN MEMORIAM – PROF. DR MURAT (MURAT) SINANAGIĆ  
1932-2025

U četvrtak, 03.04.2025. godine u Brčkom je preminuo prof. dr Murat Sinanagić, jedan od osnivača, prvi dekan i dugogodišnji profesor Ekonomskog fakulteta u Brčkom i Ekonomskog fakulteta u Tuzli.

Prof. dr Murat Sinanagić je rođen 1932. godine u Rogatici. U Brčkom je završio osnovnu školu, nižu gimnaziju i trgovačku akademiju, na kojoj je diplomirao 1950. godine. Višu Ekonomsko-komercijalnu školu završio je u Subotici 1961. godine, a Ekonomski fakultet Univerziteta u Beogradu 1963. Magistarski rad "Mikro-ekonomski aspekt efektivnosti investicija" odbranio je 1967. godine na Ekonomskom fakultetu u Skopju. Na Ekonomskom fakultetu u Subotici Univerziteta u Novom Sadu odbranio je doktorsku disertaciju 28.06.1976. godine, "Problemi planiranja i knjigovodstvenog obuhvatanja delatnosti naših društveno poljoprivrednih gazdinstava u uslovima užih organizacionih jedinica".

Od 1950-1961. godine bio je zaposlen u preduzećima PDP "Posavina" Orašje, TP "Metalteks" Brčko, TP "29. Novembar Brčko, TP "Progres" Brčko, "Majevica" Brčko i "Uzor" Brčko na dužnostima šefa privredno-računskog sektora, finansijskog knjigovođe, šefa računovodstva i finansijskog direktora.

Godine 1962. izabran je za asistenta za predmet Primijenjeno knjigovodstvo na Višoj ekonomsko-komercijalnoj školi u Brčkom, a 1963. godine u zvanje predavača više škole za isti predmet. U zvanje profesora više škole za predmet Primijenjeno knjigovodstvo s analizom poslovanja biran je 1966. godine. Školske 1975/76. godine angažovan je na predmetu Ekonomika i organizacija proizvodnje na Elektrotehničkom fakultetu Sarajevo – Odjeljenje u Tuzli. U zvanje vanrednog profesora za

predmet Računovodstvo I na Ekonomskom fakultetu u Brčkom izabran je 1976. godine i Ekonomika i organizacija u rudarstvu na Rudarsko-geološkom fakultetu u Tuzli. Za redovnog profesora biran je 1977. godine.

Prof. dr Murat Sinanagić je kao autor i koautor objavio više udžbenika, među kojima su najznačajniji Računovodstvo I i Računovodstvo II za studente prve i druge godine (1973, 1975), Knjigovodstvo proizvodnih organizacija udruženog rada za treći razred ekonomskih škola u SR BiH (1976), Skripte (1963, 1968, 1971, 1972), veliki broj članaka, rasprava i radova. Tokom svoje dugogodišnje karijere u nastavnom i naučno-istraživačkom radu, bio je rukovodilac i učesnik mnogih razvojnih projekata koji su rađeni na ekonomskim fakultetima u Brčkom i Tuzli i zaslužan za izradu i objavljivanje mnogih naučnih i stručnih publikacija.

Studenti će profesora Sinanagića pamtiti po njegovoj dobroti, kolege i saradnici, koji su imali sreću da rade sa profesorom, reći će da je on veliki čovjek, jer su iza njega ostala velika djela.

Neka je vječna slava našem dragom profesoru Muratu Sinanagiću.